

欽定大清會典事例

欽定大清會典事例卷五百八十二

兵部

出征軍令二

嘉慶五年

諭朕恭閱

聖祖仁皇帝實錄內載

諭兵部。我國家開創大業。軍法最為嚴明。凡擊斬賊衆。攻取城池。必據實奏報。復行確覈。功罪昭著。從無虛偽冒功之弊。今自用兵以來。每覽各處奏捷章疏。如擊敗賊兵。動稱斬殺甚多。或云數千。或云萬餘。或云

不計其數。甚至賊棄空城。尚云如何攻取。如何恢復。妄行虛報。微功小寇。任意鋪張。議敘之時。冀倖濫邀升賞。嗣令諸領兵大將軍將軍督撫提鎮等。凡報捷必確覈功績。據實上聞。如因循陋習。冒濫軍功。定以軍法從重治罪等因。欽此。仰見我

聖祖仁皇帝整飭軍紀。賞罰嚴明。至意朕思開國以來。我滿洲帶兵大臣居心渥樸。本無虛偽之習。且平定三藩。恢復七省。軍務極為重大。帶兵大臣中。如圖海。張勇等。皆忠勤奮勇。實力宣勞。用能迅奏膚功。克成大業。然其時

睿慮周詳。諄諄垂誠。深恐軍營奏報。有虛捏戰功。鋪張粉飾之事。飭禁綦嚴。至現在教匪。不過內地亂民。較之底定三藩。難易何殊霄壤。此時帶兵大員中。若得如圖海張勇諸人。自必早經竣事。乃自勦辦以來。迄今已及五載。尚未歲功。設以現在帶兵諸臣。勦辦三藩。豈能剋期集事。是其敵愾宣力。遠遜於國初諸臣。而其奏報不實。鋪敘戰功。冒濫邀賞之事。較之從前。何啻倍蓰。經朕屢加訓飭。諭令勝敗皆宜據實奏報。而軍營陋習。至今未能盡改。若不申嚴禁令。何以肅軍紀而飭戎行。嗣後各路奏報軍功。務宜從實。毋許

一字虛假。儻仍蹈前轍。著兵部查明據實叅奏。即所奏情形虛實。兵部或未能懸揣。但軍旅之事。斷難掩人耳目。如別經發覺。或被人指叅。必按軍法從重治罪。決不寬貸。將此通諭各路帶兵大臣及陝甘四川湖廣各督撫知之。○十九年

諭。前據文孚奏到吉林黑龍江官兵有攜帶子女之事。當經降旨查辦。旋據管理健銳營王大臣覆奏。並未分晰辦理。實屬因循草率。無恥無能。昨據富俊查明黑龍江官兵攜帶子女。分別將逆犯親屬照例緣坐。凡良民子女。派員解交該親屬認領。其無家可歸者。

暫交該官兵收養。所辦甚為認真。因交軍機大臣傳齊火器健銳二營所帶子女。覆加訊問。其籍隸滑濬二縣者僅止十八名。其餘一百三名多係順德廣平彰德等府所屬。訊係該官兵等於凱撤時沿途攜帶。領兵各員漫無約束。大屬非是。本應將該官兵等治以應得之罪。惟念此次軍務告成。極為迅速。其奮勇出力者。吉林黑龍江官兵為最。火器健銳營官兵次之。綠營兵又次之。俱經著有勞績。而攜帶子女一節。又未經誠諭於先。姑著從寬一概免其治罪。管理火器健銳營王大臣先經奉旨查辦。顯預具奏。實屬草

率。因循怠玩。文孚首先具奏。富俊查辦認真。均著加一級。見在查出各幼孩內。劉喜兒等六名。伊父母均係不肯從賊。致被戕害。實為節義可憫。劉喜兒等六名。每名賞銀二兩。著該地方官妥為收養。訪明的確親屬。再為給領。其有父母兄弟伯叔之四十名口。每名賞銀一兩。亦著各該地方官傳到親屬。令該幼孩認明給領。如所指親屬先已身故他往。即於該處養濟院收養。長大聽其謀生。俱交提督衙門。順天府派委文武各二員。解送本籍地方官收領。其無依幼孩七十五名口。暫交該官兵等領回收養。此與分給為

奴者不同。不准作踐胡為。當如子女撫養。將來如有親屬來京尋認者。即報官給領。毋許勒捐。至此次在京各大臣侍衛官員曾經派往軍營者。如有攜帶子女。及其家人等攜帶者。亦免其治罪。俱著自行查明報出。交軍機大臣訊明。分別辦理。如隱匿不報。以違旨治罪。並著吉林將軍等。及此次調派征兵之各將軍督撫副都統提鎮。將該官兵攜帶子女。俱詳細查明。照此次章程。分別辦理。各自繕摺具奏。如辦理草率。及因循怠玩者。俱以違旨治罪。昨降旨令兵部定立例條。著將攜帶良民子女。及逆犯家屬。如何分別

治罪。及領兵官如何議處。一併詳議具奏。頒示遵行。
欽此。遵

旨議奏。凡出征官員兵丁。除有不遵紀律。欺壓良民。肆
行擄掠子女者。仍按律治罪外。其於凱旋回營
之日。沿途遇有良民子女。並非逃失。該官兵等
強行攜帶者。照已附地面擄掠人口律。治罪。若
攜帶逃失良民子女。照收留逃失子女律。治罪。
其攜帶人口。有親屬者。追出給還完聚。無親屬
者。交地方官妥為撫恤。如有攜帶逆犯家屬。例
應緣坐者。除該家屬仍照例緣坐外。該官兵等

訊明知係逆犯家屬。卽照知情藏匿罪人律治罪。若訊不知情。及攜帶不應緣坐之逆犯家屬。均仍以攜帶逃失子女論。跟役等有犯。照兵丁一律辦理。領兵之該管官。跟役之家長。知情故縱者與同罪。失察者官員交部分別議處。兵丁鞭責發落。能自查出究辦者免議。若出征官兵。於經過地方。私自典買人口。均照不應重律。係兵杖八十。係官交部議處。失察各官。照例減等議處。典買人口。追出入官。奉

旨。均著照所議行。王師輯暴安良。首嚴軍紀。律載官兵

擄掠人口。若於已附地面擄掠者。不分首從皆斬監候。此指行師外域。新附版圖者而言。尚當恤其人民。以示除暴施仁之意。況內地編氓。本吾赤子。除亂逆者。按法誅鋤外。其被難流離。男婦女子。皆應亟為撫恤。若官兵偏脅攜帶。豈非自相擄掠耶。所有此次攜帶幼孩各官兵。均屬有干軍紀。本應定擬大辟。姑念伊等平日未諳法律。帶兵大員亦未先申明禁令。是以概從寬宥。著該部定律。同此次議准各條款。即行刊刻頒發京外滿漢各營。一體遵照。並著於操演日期。逐條宣講。設遇有徵調。尤當剴切曉諭。俾官兵等

恪遵紀律。約束嚴明。儻有肆意違犯者。則軍法具在。按律治罪不赦。○二十四年

諭董教增奏。叅縱兵擾民之都司。請革職審辦一摺。都司鄒至賢。疊次縱兵索詐。並鎖禁平民。得贓釋放。藐法已極。鄒至賢著即革職拏問。交該督嚴訊。獲贓確數。先將該革員資產查抄。按律定擬具奏。○道光七年

諭御史阿誠奏。請飭禁凱撤官兵沿途騷擾一摺。前因回疆四城收復。剋期凱撤。特諭該將軍等先期嚴行申禁。毋許該兵丁等沿途滋生事端。茲據該御史奏

大兵歸伍。道路綿長。恐帶兵官員約束不嚴。致兵丁有肆擾閭閻及攜帶子女等事。著再嚴切申諭帶兵各官。務須宣示律令。恪守科條。並著沿途各督撫等隨時嚴加稽察。儻有不肖兵丁私攜男女幼孩。及途間擾累居民鋪戶。查明立即按律治罪。並將該管官員叅奏。從重懲處。決不寬貸。○十年

諭。國家歲糜錢糧。養育兵丁。原以偶遇兵戎。共奮勦賊。保衛良善。近來逆回安集延布魯特等。深負曲宥重恩。糾合霍罕偷入卡倫。在喀什噶爾等處倡獗。戕害官兵。實為罪大惡極。爰命大學士長齡督率三萬有

餘官兵勦辦。復調吉林黑龍江三千兵丁。此屬俱係精銳。一至軍營。烏合賊衆。自必計日除滅。功竣凱撤。該官兵等受朕恩施。何榮如之。惟經由四省地方。恐有無知之徒。偶因車輛食物細故。肆向驛站爭鬧。沿途擾累閭閻。衛民而害民。烏乎其可。儻有此等不知體統。妄為滋事者。該領隊副都統等。即一面拏交地方官嚴行圈禁。一面據實叅奏。朕必將犯法之徒。按軍法辦理。決不寬貸。領隊副都統等。徇庇不行奏聞。致被督撫叅奏。不惟犯法之人。從重治罪。必將該副都統等。一併嚴加議處。著此次監放官兵賞食王等。

於吉林黑龍江官兵到日。即將此旨自副都統以及官兵。按名明白曉諭。俾各遵行。○十二年

諭。御史馮贊勳奏請嚴禁弁兵吸食鴉片煙。以肅營伍一摺。鴉片煙屢經降旨嚴禁。此風總未靜息。固由積習相沿。實緣各省大吏。未能實力查禁。近來粵閩等省兵丁。吸食鴉片煙者甚多。即將弁中食鴉片煙者亦復不少。相率效尤。恬不為怪。筋力疲軟。營伍廢弛。職此之由。即如連州進兵孱弱誤事。尤為可憾。國家設兵衛民。營伍皆成勁旅。無事則人懷敵愾。有事則士盡干城。除戎器以戒不虞。方為有備無患。似此操

防巡哨。有名無實。必至一省並無一兵可用。尚復成何事體。粵閩既有此習。其餘各省恐亦不免。著各直省督撫提鎮。通飭陸路水師各營將弁。務須正己率屬。不得仍蹈故習。經此次嚴禁之後。如將弁私食。即將該將弁揭參。如兵丁私食。即將該兵丁治罪。並將該管將弁議處。方為不負委任。若泄泄沓沓。故態復萌。一經科道叅奏。或經朕別有訪聞。必將該管督撫提鎮從重懲處。決不寬貸。毋謂誥誡之不早也。○十

三年

諭。國家設兵衛民。所以戢姦禁暴。凡有將帥之責者。訓

練於無事之時。固宜技藝精良。足資捍衛。尤須講明紀律。俾之有勇知方。庶為節制之師。克備干城之選。乃近日臺匪不靖。調派河南等省官兵進剿。旋因首犯就擒。餘匪殆盡。中途停撤。尚未臨陣殺賊。而沿途滋事之案。業已層見疊出。如御史周濤所奏。河南征兵。行至宿州。毆斃人命。撤回時。又攜帶幼童至十七名之多。福建兵丁。勒折夫價。毆斃夫頭。遊擊庚音保任聽兵丁定期不行。開單令地方官應付。千總李福祥勒借番銀。又有兵丁強搶鹽館之案。種種不法。皆由平日訓練不明。因循廢弛。以致恃強藐法。罔知顧

忌。甚至帶兵員弁。通同需索。似此驕縱。又何以戢姦
禁暴乎。所有滋事弁兵。業經飭交該督撫等從嚴懲
辦。嗣後各將軍都統督撫提鎮。務須申明紀律。實心
教導。示以法無可寬。令不可犯。偶有桀驁不馴者。即
隨時懲創。毋稍姑息。作其果敢之氣。戢其橫悍之心。
使一律精純。悉成勁旅。儻仍前廢弛。必將管轄大員
懲處不貸。慎勿視為具文。以副朕整飭戎行諄諄誥
諭之至意。○十六年

諭容照奏查禁歷年陋習一摺。馬蘭鎮地方。鎮將以至
千把總。向遇公出。均役使兵丁挑負行李。名為挑夫。

該兵丁等常充此項差使。槍箭技藝。自不能望其合法。國家費帑養兵。操防是其本務。若徒供官弁役使之用。必至營伍廢弛。有名無實。不可不嚴行飭禁。著即隨時查察。儻所屬員弁內。嗣後仍有役使兵丁之事。即行據實奏處。毋稍姑息。○咸豐二年

諭給事中金肇洛奏兵差騷擾過甚。請飭嚴查一摺。近年賊氛不靖。疊次命將出師。原期除暴安良。屢經降旨令帶兵各員。嚴加約束。不准兵丁沿途滋擾。若如該給事中所奏。官兵需索車馬酒食。千把總以上等官。酒席之外。又有程儀。及另折車價船價各名目。沿

途訛索。有增無減。稍不如意。則百般陵辱。甚至任意
逗遛。不肯出境。偏令該省督撫參辦州縣。以致地方
苦累。民不聊生。此等惡習。總由帶兵各員。不能身為
表率。兵丁效尤。益無忌憚。若不嚴行約束。何以整飭
戎行。著統兵大員嚴飭將弁。徧行曉諭兵丁。經過地
方。於例外絲毫不准騷擾。並著各督撫飭令該州縣。
按例支應。催令前進。如有前項弊端。立即將滋事官
兵指名稟報。由該督撫奏聞。扣留訊究。即照軍律嚴
行懲辦。○三年

諭張亮基等奏查明已革湖北提督及參將下落等語。

前因岳州失守。疊經降旨諭令該督撫等查明已革提督博勒恭武如何下落。迅速具奏。茲據該署督等奏稱。該革員自岳州潰逃後。帶兵徑回武昌。又棄軍私回漢川。復藉養病輒回穀城。提督本署。今又欲前赴江南。軍前報效。種種荒謬。實出情理之外。該革員以湖北提督大員。奉旨防守岳州。乃始則見賊先遁。繼復輾轉偷生。若不明正典刑。何以嚴申紀律。博勒恭武俟提解到省。著即處斬。毋庸再行請旨。○五年。御史宗履奏請嚴查潰兵一摺。自粵逆滋事以來。各省旗綠營汛弁兵。辦防助剿。徵調之數甚繁。其能

奮勇出力者。經該將軍督撫等奏保。朕均不吝恩賞。隨時量予獎敘。至遇賊逃散。本有應得罪名。若因人數衆多。誅不勝誅。概不懲辦。仍令覘然入伍。濫食錢糧。何以申軍律而肅戎行。據該御史奏稱。逃兵私歸本營。請存記降黜。分別汰留。各營汛查明無軍營咨照者。即呈明停支額糧等語。似尚格外從寬。當此賊氛不靖之時。無論協勦鄰封。備防本省。均應嚴申紀律。著各將軍督撫。飭查逃回本營之兵丁。覈其逃散情節輕重。分別懲辦。不得姑息容留。聽其冒領糧餉。至將弁私逃。尤屬可惡。即著嚴拏正法。以儆其餘。該

將軍督撫等。即將此項逃回兵丁。應如何覈其情節。分別懲辦之處。嚴定章程。妥議具奏。○八年

諭。張芾奏已革遊擊縱兵擾民。統兵大員袒護保留各等語。據稱已革遊擊楊國正。在江山一帶搶掠鋪戶。姦擄婦女。與國丁互鬪。以致縣城失事。明安泰路出龍游。兵多淫掠。周天受兵過湯溪。占房焚屋。金華鄉國以兵勇奪牛赴營具控。周天受輒行捕殺數十人。指為通賊。並欲將楊國正保留錄用等語。楊國正先經晏端書以帶兵退避叅奏。並未將其擾民激變之處聲敘。迨經奉有諭旨革職。拏問何以任其逗遛軍

營到處騷擾。龍游湯溪距省較近。晏端書豈無聞見。何以不聞奏劾。總由平日意存見好。以致帶兵將領。任聽兵勇擾害地方。毫無顧忌。著晏端書仍遵前旨。即行提省嚴審。並將縱兵殃民各情。一併嚴切根究。此等滋事兵勇。該撫一有所聞。即當嚴飭將弁。正法數人。以儆其餘。如有袒護之員。即行從嚴參劾。自然畏法斂迹。不至相率效尤。嗣後該撫如聞各營再有。不遵軍律騷擾鄉民者。即派大員特令前往。會同帶兵之員。將滋事兵勇。以軍法從事。毋得一味姑容。自干重咎。○同治元年

諭嗣後各路軍營。於外來投效將弁。非有統兵大員移咨文件。一概不准留營。以杜效尤而肅軍律。○又

諭軍興以來。各路軍營。召募兵丁不下數十萬人。其志切同讎殺賊立功者。固屬不少。亦有曾充匪類。為鄉里所不齒。一經投效。漸保官階。該勇弁恃有護身之符。輒告假回家。儼然以職官自命。不受地方官約束。甚至野性未馴。復萌故態。地方官既無可稽考。各國紳雖有聞見。亦且畏勢而不敢言。黨與漸多。擾害鄉里。亟應嚴行查辦。以杜亂萌。嗣後各路統兵大員所轄勇丁。無論保至何項官階。凡因事撤遣及告假回

籍者。均著給予執照。將事由限期。開載明白。一面行文知照各該地方官。以備查覈。如該勇弁等有倚勢作威藐法橫行情事。該地方官即與齊民一體查辦。毋得以曾經打仗。稍事優容。其有未經告假私行回籍者。既無執照。又無各營咨會。即著照逃勇例從重懲辦。以肅軍律而靖閭閻。○又

諭。馮子材魁玉奏嚴定營規。請申明軍紀各等語。句容逆首糾合匪黨。分屯湯岡一帶。都司田振武畏蕙不前。實屬皆不畏法。馮子材等將該都司即在軍前正法。辦理尚屬認真。遊擊滕代倫都司李占春約束不

嚴均著照所請一併摘去頂戴。鎮營將弁兵勇動以餉需缺乏。藉口飢疲。不戰而遁。必須嚴加整頓。以挽積習。嗣後如有臨陣退縮未戰先潰之員。著照馮子材等所擬。其都守以下官弁。即在軍前處決。其副將參遊各員。一面鎖禁。一面請旨遵行。以振頹靡而肅紀律。即著馮子材宣示各營。俾知儆惕。○又

諭前因多隆阿奏叅記名提督趙既發擅自離營。並將勇丁口糧私行帶去一千餘兩。當經降旨革職。永不敘用。茲據給事中王憲成奏請將該革員私帶勇糧照數追還。並治以應得之罪等語。軍營餉需關係緊

要。近來各路帶兵將弁。往往浮冒剋扣。中飽私囊。甚至任意取攜。毫無顧忌。致令行間士卒。不免飢寒。積弊日深。殊堪痛恨。此項勇丁口糧。自係軍營正款。若令該革員擅自攜去。竟置不問。轉致違令藐法之員。得遂其侵蝕營私之計。殊不足以肅紀律而重軍精。即著多隆阿將該革員趙既發。私行帶去勇糧。勒令如數繳出。仍計贓科罪。按律懲辦。以肅戎行。嗣後各路軍營。如有似此侵吞餉銀藉端肥己者。除將所侵銀兩照數著追外。並著各該大臣督撫等。於查明後。即行嚴叅究辦。從重治罪。以儆效尤。○又

諭浙江黃巖鎮總兵黃彬。自幫辦江北軍務以來。總統水師。從未見其於沿江賊匪所踞各城及附近口岸。痛勦一次。攻克一城。迨經訪察。該總兵專以設卡固利為事。縱容兵勇。擄劫商民。藉圖肥己。偶奉檄飭。焚毀沿江邨莊。擄殺難民。捏報勝仗。跋扈橫行。肆無忌憚。黃彬以微末武弁。不數年間。擢至專閫。派令幫辦重任。宜如何整頓營伍。奮勇勦賊。乃竟敢恃恩驕恣。肆意妄行。以致民怨沸騰。若不從嚴懲辦。何以肅軍律而飭戎行。黃彬著撤去幫辦軍務。總統水師各差。即行革職。並著都興阿。解交曾國藩軍營。聽候查辦。

○又

諭昨因勝保驕恣欺罔降旨將其革職等因。解京議罪。並密諭多隆阿將一切應辦事宜詳籌妥辦。本日據英桂德興阿奏勝保劣蹟昭著訪實密奏一摺。覽其所奏如所稱勝保虛報勇額及月提餉銀肥己累萬盈千。且扣剋盤剝兵丁各等情。情節最為重大。他如捏報勝仗賄賂荒淫各節。與疊次有人叅劾摺件大。致相同。勝保受

歷朝養之恩。當此時事艱難。餉需支絀。宜如何激發天良。撙節覈實散放。以勵軍心。乃竟侵剋兵餉。自飽

私囊。且子母重權。精於滾折。致飢兵四出搶掠。接仗動輒挫敗。負國殃民。欺君罔上。莫此為甚。本日業經派員將勝保京師內外寓所貲財產業。嚴密查抄。潼關現有勝保公館。西安省城。勝保亦必當有寄頓婦女貲財之處。著多隆阿於接旨後。迅即派委妥員。前往各該處嚴密查抄。所有抄出物件貲財。即著多隆阿傳旨賞給勝保部下兵勇。以示澤普。大公俾兵勇咸知感奮。多隆阿接奉此旨。務須密速妥辦。於一二日即行辦完。不可稍稽時日。仍一面遵照前旨。將勝保各種款蹟。並此次英桂等所叅各節。商同李宗燾

詳細訪查。據實奏。多隆阿傳旨拏問勝保。如勝保尚敢抗不遵旨。即著多隆阿將其正法軍前。以爲人臣欺罔不法者戒。○又

諭前因軍營積習日深。曾經通諭各營。痛除諸弊。力加整頓。乃近聞各營武弁。尚有狃於積習。平日徒事嬉游。臨敵輒行退縮。遷延畏蕙。每至貽誤事機。殊堪痛恨。嗣後各路統兵大臣及各直省督撫。務當申明紀律。如有日事恬嬉。不習軍旅。或遇賊接仗。觀望不前。甚至文員當先陷陣。而武弁等反擁兵坐視。不肯救援者。一經查出。即行從嚴懲辦。斷不准稍涉徇縱。並

著兵部將此項劣弁應得處分罪名從嚴擬定以肅軍律。○二年

諭前因軍營積習日深。疊經通諭各營。痛除積弊。並令兵部將臨敵退縮遇賊觀望等項劣員。應得處分罪名。從嚴定擬。茲據賈楨等奏遵議軍營各項劣員處分罪名。請旨遵行等語。用兵以紀律為先。近來各省軍務未竣。其間文武同心協力折衝禦侮者。固不乏人。而各營員弁。狃於積習。退縮不前。遷延貽誤者。尤屬不少。若不嚴定章程。無以振軍心而昭炯戒。著照兵部刑部所請。嗣後盜賊侵犯城池。蹂躪地方。帶兵

員弁。如有畏葸觀望。貽誤事機者。卽照律定擬斬監候。如係兵餉充足之區。先期逃散者。著照奏定章程。請旨卽行正法。如有盜賊入境。及已奉調遣。不能星馳策應。以至賊勢蔓延。卽照律擬軍。其有文員當先陷陣。而武弁擁兵坐視者。卽照律斬監候。請旨卽行正法。如有軍營武職。日事恬嬉。不習軍旅。傲慢規避。及擅離汛守者。卽照例革職。不准留營。如鄰境有賊。帶兵員弁。坐糜糧餉。不妥籌堵禦。以致賊至潰散。失守地方。卽照例革職。不准留營。仍從重發往軍臺新疆。由該督撫及統兵大臣。酌覈情罪重輕。定擬具奏。

其該管上司及原派之上司。均照本例分別加等議處。如聞鄰境警報。將軍提督以下各官。不親身領兵馳往會剿。託故遷延。貽誤事機者。著照例加等革職。不准留營。至於軍營帶兵武職。如有不能約束兵丁。以致生事擾民。殺傷人命者。除該兵丁照軍法從事外。其帶兵員弁。均照本例加等降三級調用。不准抵銷。經此次明定章程之後。各路統兵大臣及各直省督撫。務當轉飭所屬員弁。一律遵照實力奉行。儻仍蹈從前惡習。即按現定章程。據實叅辦。以肅軍律。○

又

諭前因文煜奏參將王恩第通賊擾民各情。當經諭令該督等訊明正法。復於劉長佑到任後。諭令該督嚴密辦理。茲據奏稱遵旨將該革員提至軍前正法等語。所辦甚是。王恩第以參將大員。輒敢廣集黨與。私通賊匪。到處擄掠。實屬罪不容誅。所有該部勇丁。業經罪坐主將。即著妥為遣散。免其查究。嗣後各路軍營帶勇員弁。務當恪守軍律。奮勉立功。儻有通賊搶掠各情。即著統兵大臣各督撫等。隨時查辦。毋稍姑縱。○三年

諭僧格林沁奏用兵之道。首貴嚴明偵探。知已知彼。調

度戰守方能合宜。近見各路軍營奏章。每以賊衆兵
單為詞。獲捷之報。絡繹不絕。而賊勢愈衆。蔓延愈廣。
總由領隊之員。不能確探賊情。賊至不肯迎頭堵擊。
賊去又不跟蹤追勦。但敷衍出境。即報勝仗。故意以
少報多。諱敗為勝。豫為冒功邀賞地步。握兵符者。既
不能身臨前敵。復不知詳加查考。率行據稟入告。相
沿成習。亟須認真整頓等語。各路軍營惡習。以少報
多。諱敗為勝。疊經通諭各該統兵大臣及督撫大吏。
痛除積弊。不啻三令五申。茲覽僧格林沁所奏。是各
路軍營積弊。仍未革除。該統兵大臣等仍不能認真

整頓。似此積習日深。何以殄滅賊氛。又安黎庶。僧格林沁。此次督師。由豫入楚。所言軍營各弊。自必確有見聞。該大臣老於用兵。惟能真實不欺。故能所向克捷。洵足為各路軍營之法。嗣後各路營員及統兵大臣等。於賊勢之多寡。接仗之勝負。均須字字從實奏報。如仍任意鋪張。未能掃除積習。一經有人叅奏。必將捏報軍情之營員及統兵大臣等。一併從嚴懲治。決不姑容。○四年

諭。恩麟奏請將縱勇滋事。借故脫逃之武弁查拏等語。已革參將鄒本五。前經陶茂林派令赴楚募勇。行抵

陝西咸陽藍田等處毆官毀署肆行搶奪情節最重。疊經有旨交都興阿雷正綰拏辦。乃該革弁於所部勇丁鼓譟散去之時。託言帶兵追趕。經陶茂林派弁往查。日久並未回營。難保非因所犯情罪重大。藉故脫逃。希圖漏網。若不嚴拏懲辦。何以飭法紀而肅戎行。已革參將那本五著湖南巡撫轉飭該犯原籍湘鄉縣嚴密查拏。並著各省督撫暨各路統兵大臣一體嚴拏務獲。即行就地正法。以昭炯戒。○又

諭甘省用兵日久。而匪勢愈熾。地方情形日益彫敝。皆由帶兵各員習氣太深。地方大吏諸事廢弛。種種情

形實堪痛恨。雷正綰曹克忠兩軍。近因進勦金積堡。失利。弁兵傷亡頗多。現在士氣新挫。逆猷必至益張。楊岳斌當責令雷正綰等。申明紀律。重振軍威。再圖進取。以贖前愆。劉正高沈大興等所部。淫擄焚殺。經楊岳斌拏獲三人正法。所辦甚是。該二員何以拔營他徙。並著查明叅辦。嗣後如有不遵調遣及縱勇騷擾情事。即著按照軍法懲辦。庶幾壁壘一新。於軍務方有起色。○又

諭。劉蓉奏雷正綰營兵勇潰變。現在辦理情形一摺。雷正綰一軍。由鄂入陝。疊著戰功。轉戰而西。在甘肅地

方。屢次摧堅破敵。克復城寨甚多。前因金積堡勦賊失利。當將該署提督革去幫辦。用示薄懲。該營將弁自宜愧勵交加。立功自效。茲據劉蓉奏稱該營部將胡大貴等。竟敢因師挫糧缺。誣潰滋事。迫脅兵勇在固原一帶肆行殺掠。圍逼涇州。經提督周顯承等。率同在城文武登陴守禦。將謀為內應之副將何成蛟正法。並將逆黨匡文武等誘擒。被脅兵勇復經周顯承等。諭以大義。招撫解散。胡大貴等知衆心不附。相率遁去。雷正綰親至涇州曉諭兵勇。誓死與賊決戰等語。雷正綰於所部將士謀變。未能即時懲辦。本有

應得之咎。惟念該提督平日打仗奮勉。勞績卓著。著從寬免其置議。此係朝廷破格恩施。該署提督宜知感知愧。倍加策勵。以贖前愆。記名提督胡大貴。副將雷恆李高啟。乘機倡亂。實屬罪不容誅。均著即行革職。緝拏正法。以昭炯戒。○又

諭神機營奏進剿接仗情形。請將帶兵觀望之員懲處。並請嚴申軍律各摺片。近來各路軍營。於帶兵貽誤各員。每多姑息隱庇。以致兵懦將驕。釀成巨患。若不嚴申紀律。何以整飭戎行。所有直隸帶兵各員及所部各軍。如有觀望畏葸。不肯合力勦辦者。即著穆騰

阿據實嚴參。按照軍律懲辦。以儆情玩。該都統既有督帶之責。自當破除情面。嚴申紀律。以肅戎政。不得代人受過。儻稍有瞻徇。別經發覺。惟該都統是問。○

六年

諭劉長佑奏查明不守軍律之都司從嚴懲辦等語。都司陳希協。經劉長佑派赴軍營勦賊。輒敢於賊匪經過邨莊。掠取民間衣物。私自運回。實屬膽大妄為。業經劉長佑訊明正法。所辦甚是。行軍以紀律為先。若管帶之員。先不能潔己守法。更何能約束兵丁。近聞各營兵勇。於經過地方。頗有騷擾民間之事。皆由帶

兵各員束身不嚴。難申軍律所致。積習實堪痛恨。嗣後各路統兵大臣。務當嚴明約束。凡官兵經過城市鄉邨。概不得絲毫擾累。如查有前項情弊。即照軍法懲治。毋稍寬縱。○七年

諭。馮子材奏粵西軍務疲玩。請嚴申紀律等語。廣西南太泗鎮等府屬。股匪林立。屢經官軍進剿。遷延日久。未能一律肅清。皆由帶兵各員弁。玩法縱賊。糜餉殃民。種種挾制情形。殊堪痛恨。一省如此。恐他省亦所不免。若不申明軍律。何以肅法紀而勵戎行。嗣後各路統兵大臣。暨用兵各省分督撫。務當力加整頓。正

已率屬。今在必行。遇有軍營帶兵之員。失機債事。貪鄙玩誤者。文官四五品。武職三品以上各員。即行嚴叅懲辦。其文員六品以下。武弁四品以下。即行奏明於軍前正法。以期迅掃賊氛。拯民水火。毋得視為具文。致干重咎。○又

諭。丁寶楨奏。鼎軍勇丁索餉滋事。請飭查拏懲辦一摺。藩司潘鼎新所部勇丁。駐紮山東韓莊地方。因將次遣撤。索發欠餉。將該處鋪戶搶掠一空。迨經丁寶楨前往彈壓。始拔隊南赴宿遷。其不知法紀。實出情理之外。著丁寶楨即飭各屬嚴拏逃散勇丁。盡法處治。

東省協撥該營餉項。本無蒂欠。此次該撫又另撥津貼銀二萬兩。解赴鼎軍。則該軍更不能有所藉口。但恐該勇丁桀驁性成。在宿遷一帶。仍復滋擾。著張之萬就近派委要員。前往彈壓。並著馬新貽趕緊添派文武大員。會同督率。令其分起出境。毋許稍滋事端。該勇丁行抵皖境。即著英翰吳坤修傳知潘鼎新。妥為遣散。俾安生業。以免在皖復行生事。其起意搶掠鋪戶各勇丁。法所難宥。著李鴻章英翰吳坤修嚴飭藩司潘鼎新及代統之總兵潘鼎立等。悉數查拏。解赴東省。交丁寶楨嚴行懲辦。不准稍涉寬縱。其不能

約束之各將弁。並著李鴻章查明嚴叅。以申軍律。○

九年

諭。英桂奏請將不能約束兵勇之員弁。分別懲處一摺。福建莆田縣地方。於本年五月間。有革勇林瑞來等。因官兵查拏花會。輒敢糾約在營勇丁。竊取號衣。借名搭犯。肆行搶掠。並有殺斃人命。姦淫婦女情事。現經拏獲正法。並分別辦理。管帶各員疏於防範。實屬咎無可辭。儘先守備朱有升。藍翎把總彭行浩。福建興化右營裁缺把總劉廷璋。均著即行革職。參將朱長陞。守備陳得功。均著交部議處。以示懲儆。通年以

來。各省遣散勇丁。往往潛匿各處。乘機搶掠。擾害地方。並有造言惑衆。藉端生事各情。亟應嚴拏懲辦。著各路統兵大臣暨各直省將軍督撫。督飭該地方官。遇有此等編造謠言乘機滋事之勇丁。立即查拏。從嚴懲治。毋稍寬縱。○又

諭。穆圖善奏營勇索餉滋事。請將失察之統領革職。一摺。甘肅駐紮省垣各軍。經左宗棠飭西征糧臺撥給一月滿餉。以示體恤。復因買糧需款甚亟。飭該省司道將此款改為買糧銀兩。隨後再將月餉補解。乃各營哨官。竟敢帶同散勇多人。齊入藩署。求發足餉。勢

甚洶湧。該司道等恐釀成事端。已允將原撥餉銀全數覈發。而該勇丁復敢拋擲輒石。致蘭州道蔣凝學身受石傷。實屬目無法紀。移圖善已將糾約滋事之親兵中營幫辦副將張金魁查出。即行正法。仍著該將軍督飭各營統領。隨時彈壓各勇丁。不准稍有滋鬧。統領親兵中等營記名提督馬洪勝。雖查無同謀情事。而於幫辦出營滋事。毫無覺察。實難辭咎。記名提督借補陝甘督標前營遊擊馬洪勝。著即行革職。並革去統領。以為軍律不嚴者戒。○十年

諭。岑毓英奏參將邵天貴等。燒殺搶擄。目無法紀。已查

等正法等語。軍行以紀律為先。騷擾在所必禁。嗣後如有似此不法之員。並著該督撫等一體嚴懲。以肅軍律。○十一年

諭鮑源深奏奉差營員勇丁。在晉滋事。請旨辦理。暨記名提鎮奉差經過地方。請飭恪遵功令。各摺片。軍營奉差弁勇。藉端騷擾地方。大千功令。此次鮑源深巡閱河防邊隘。即有嵩武軍弁勇毆傷車夫。及卓勝營差官記名提督徐名揚。自營帶馬回皖。因討關未遂。率眾施放洋槍。肆罵鬧關情事。實屬不成事體。並聞近來各營差官。甚至有包攬客貨。馱載婦女。夾帶游

勇營混。經過關卡。不服盤詰等情。似此情形。實堪痛恨。亟應嚴行懲辦。以儆兇頑。現在拏獲在晉滋事之嵩武軍勇丁。已由鮑源深解交原營。並咨令將逃回之勇。一併拏獲。卓勝營差官及勇丁人等。亦咨明皖省查辦。即著各該營從嚴究治。毋稍寬縱。嗣後各路統兵大臣。遇有差委員弁。著即申明紀律。嚴加約束。所給執照。務將勇丁馬匹。及所攜槍械數目。並應需車輛若干。以及程途期限。詳細開明。經過驛站暨關津隘口。均令呈驗放行。如有不遵盤查及騷擾逾限情弊。准由地方官查拏。隨時稟報督撫。奏明懲辦。至

各營中記名提鎮之員。除統帥外。其餘在營差遣者。如有奉差經過驛站關津。均著恪遵功令。聽受地方官稽查。概不准多帶勇丁。濫索車馬。尤不准夾帶貨物。私載婦女。如敢故違。即由各該地方官稟明嚴叅。從重究辦。各路統兵大臣。務當嚴申軍律。飭令各差官一體遵照。毋得自蹈愆尤。○光緒元年

諭。穆騰阿奏遵將甲兵關關協領衙署案犯分別審擬一摺。上年京口駐防甲兵榮華等。因催放兵米。以致人多擁擠。損壞協領衙署。雖訊無爭鬭情事。究屬不守法紀。榮華榮升祥林。均著革去馬步甲。

仍照所擬杖一百徒三年。各折枷號兩箇月。滿日照數鞭責發落。榮升並撤銷六品功牌。以肅營伍。協領延康等於各兵聚鬧時。不及約束。情尚可原。延康善連著開復革職留任處分。仍交部議處。副都統恆惠雖無別項情弊。究屬辦理不善。著交部議處。○二年

諭。黎培敬奏請將約束不嚴之哨長懲處等語。哨長都司周仁和。守備秦泰山。於所部勇丁。索餉滋鬧。不能開導彈壓。實屬庸懦不職。周仁和秦泰山。均著革職永不敘用。以示懲儆。○三年

諭何璟丁日昌奏特參廢弛營伍之守備等語。臺灣
滬尾營水師守備嘉朝泰。平日不能約束兵丁。整
頓營伍。以致該營犯事及老弱充數至八十餘名
之多。實屬荒怠不職。嘉朝泰著即革職永不敘用。
以為玩視營務者戒。○又

諭銘安等奏請將勦賊不力及縱賊殃民之帶兵各
員懲辦一摺。吉林五常堡地方。突有馬賊滋擾。焚
掠所屬山河屯。經一晝夜之久。協領志超並不親
身督勦。又不迅速派隊往援。實屬畏蕙無能。該員
前於馬賊焚搶二道河口時。並有聞警潛行回家

避賊情事。居心尤為巧滑。志超著革職永不敘用。
委參領防禦雙全。縱賊遠颺。並不追剿。復出言懈
怠軍心。情節尤為可惡。雙全著革職發往軍臺效
力贖罪。限滿不獲投效軍營。保留開復。以示懲儆。
佐領吉陞阿。派勦漂河松嶺一帶賊匪。未能得力。
著摘去頂翎。留營差遣。償再不知愧奮。即行從嚴
叅辦。嗣後帶兵員弁。如敢玩泄因循。仍蹈從前積
習。即著銘安等將貽誤軍機。不能用命之將領。嚴
行懲治。協領佐領以上各員。請旨正法。防禦以下
各員。查明即在軍前正法。以昭炯戒。○七年

諭。前據御史李士彬奏。特叅總兵萬重暄。王永勝貪劣各款。當經諭令彭玉麟查辦。茲據該侍郎查明具奏。江西水師統領記名總兵萬重暄。雖無扣勇減餉之事。所叅收受節壽陋規。亦無實據。惟出門乘轎。所至盛飾廚傳供帳。並有開局聚賭情事。江西南贛鎮總兵王永勝。狎優飲酒。時令民間女子入署作工。雖非收買販鬻。而不知遠嫌。以致物議沸騰。管帶江西內河水師營官記名總兵蕭福。均有入局聚賭之事。萬重暄。王永勝。蕭福。均著革職。永不敘用。○十年

諭提督黃超羣。道員方勳。前據張佩綸奏扼險堅持。出奇設伏。截殺法兵多名。是以降旨獎敘。茲據左宗棠等查明該提督等所部兵勇。有在船廠駐守未退者。有退至距廠數里地方者。並有搶掠情事。該提督等紀律不嚴。亦可概見。黃超羣著撤去黃馬褂。方勳著撤銷勇號。以昭覈實。已革遊擊張成身充輪船營務處。並不竭力抵禦。竟敢棄船潛逃。雖此次馬尾失利。不能咎該革員一人。惟該革員有統率各船之責。玩敵怯戰。亟應從嚴懲辦。張成著定為斬監候。秋後處決。解交刑部監禁。○十一

年

諭李秉衡奏營勇中途滋事。請將該營官議處一摺。據稱調赴關外之鄂軍各營。遣撤回防。提督胡定坤統帶所部勇船。行至南甯府屬三洲灘地方。該勇丁因索取灘夫起衅。致斃人命。胡定坤約束不嚴。實難辭咎。著先行交部議處。仍著裕祿彭祖賢嚴飭該員。迅速查明兇犯。勒令按名交出。歸案訊究。儻敢再事延玩。即行從嚴叅辦。現當邊防兵勇遣撤之時。著通諭統帶各官。申明紀律。隨時嚴加約束。儻有沿途滋擾情事。除將該勇丁按律嚴辦。

外。並將該管營官從重懲處。決不寬貸。

欽定大清會典事例卷五百八十三

兵部

恩錫

封贈

封贈○順治初年定滿漢武職恭遇

恩詔一品至五品給

誥命六品以下給

敕命各官品級均以

詔下之日為定八旗武職由都統等造冊駐防官由

將軍等造冊綠旗營武職由督撫提鎮造冊咨

部覈明給以封典滿漢公侯伯均封光祿大夫

公妻封為公妻一品夫人。侯妻封為侯妻一品夫人。伯妻封為伯妻一品夫人。仍分別一二三等。八旗一品官封光祿大夫。妻封一品夫人。二品官封資政大夫。妻封夫人。三品官封通議大夫。妻封淑人。四品官封中憲大夫。妻封恭人。五品官封奉政大夫。妻封宜人。六品官封承德郎。妻封安人。七品官封文林郎。妻封孺人。八品官封修職郎。九品官封登仕郎。綠旗營武職。正從一品官封榮祿大夫。妻封一品夫人。正二品官封驃騎將軍。從二品官封驍騎將軍。妻均封夫

人。正三品官封昭勇將軍。從三品官封懷遠將軍。妻均封淑人。正四品官封明威將軍。從四品官封宣武將軍。妻均封恭人。正五品官封武德將軍。從五品官封武略將軍。妻均封宜人。正六品官封昭信校尉。從六品官封忠顯校尉。妻均封安人。○又定武職恭遇

覃恩。及三年考滿。均給封贈。○又定凡父現任者不封。已致仕及已故者准封贈。有願棄職就封者聽。○又定父母有兩子當封者。從其品大者封。婦人因其子封贈。而其夫本有官當封者。亦從

其品大者封。○五年議准。一品官封贈三代。

誥命四軸。二三品官封贈二代。

誥命三軸。四五品官封贈一代。

誥命二軸。六七品官封贈一代。

敕命二軸。八九品官止封本身。

敕命一軸。○九年議准。官弁緣事革職者。追奪。

誥敕。婦人因夫與子受封者。不許再嫁。違者追奪。

誥敕。照律治罪。受封官妻因夫亡歸母家者。准其父。

母領回繳還。

誥敕。○十年議准。已經題封各官。有將姓名履歷遺。

漏錯誤。親身檢舉求增改者。准揭內閣撰給。○
又題准。受封各官。曾祖父母祖父母父母曾犯
十惡姦盜除名等罪。及經考察並緣姦賊革職
者。不准封。其妻非禮聘正室。或係再醮及娼優
婢妾。概不准封。○十四年題准。凡

恩詔內有加級者。均以新加之級。給予封典。○十六
年議准。

詔後緣事革職。及軍政降調者。不准封贈。○又題准。
詔後降調官員。非犯貪酷者。仍給予前任封典。○又
題准。為人後者。應封繼祖父母父母。如繼祖父

母父母已經受封。願將本身及妻室封典。馳封本生父母者。准其馳封。○康熙元年議准。受封各官未領

誥敕。又遇

恩詔。請改新銜者。不必具題。揭送內閣改給。已領者。交還原軸。亦准改給。○三年題准。八旗武職。封典舊隸吏部。今改歸兵部職掌。其品官封號。仍用文銜。○六年議准。八旗世爵。年幼未經引見者。不封。丁憂患病候補各官。不在現任者。不封。綠旗營外委。不封。

詔後致仕病故官准照原官封贈。○八年議准應封

武職各官。祖與父品級大於子孫者。祖與父。祖

母與母各照祖與父原官封贈。如祖與父係文職移咨吏部

祖父品級小者。各照子孫官封贈。命婦因子孫

品級受封。並加太字。若已故及曾祖祖父在者。

不加太字。○又題准襲伯叔之爵者。准封贈伯

叔父母。襲祖爵者。仍封贈其父母。凡封母者。止

封嫡母生母。繼妻所生者。謂其母曰生母。繼母不准受封。嫡

母在。所生母不得並封。庶母之生母。其嫡母歿

准封。若嫡母已受封。所生先歿者。准其追贈。父

官大於子者。嫡母以父官封。所生母以子官封。封妻者止封正妻一人。正妻未封而歿。應封繼妻者。正妻准追封。繼妻止封一人。○九年議准。詔後緣事革職。後經還職者。准給封贈。○又議准。考滿封贈之例停止。○十四年議准。受封官將誥敕質當者。革職如收藏不慎。以致蠹蝕損傷。或破壞汙失者。皆罰俸六月。其因水火盜賊毀失者。免議。均准題請補給。○十六年題准。受封者因軍務獲罪。及貪贓革職者。所給

誥敕皆追奪。若祖父原有官未經受封。後因子孫封

贈者不追奪。其因公註誤革職者止追奪本身。
誥敕。○二十七年奏准。各官受封。每任內止封一次。
如受封後改任者。照所改之職封贈。升職加銜
者。照升職加銜封贈。其受封之後並未升轉者。
雖有加級。不准重封。八旗武職升轉在

詔前者。不分已未到任。均准封贈。綠旗營武職不在

此例。綠旗營武職在詔前升轉
到任者不准封贈。八旗為綠營官亦照

此例。○四十二年議准。因公註誤革職官。原領

誥敕。免其追奪。○五十二年題准。凡加級請封人員。

級多者。仍限以制。七品以下不得逾五品。五六

品不得逾四品。三四品不得逾二品。○雍正二年奏准。綠旗營正七品官。封奮力校尉。妻封孺人。○三年覆准。嫡母繼母生母准其並封。其四品以下。應封父母及本身妻室各官。有願將本身妻室封典。馳封祖父母者。准其馳封。二三品官。馳封曾祖父母者。請

旨定奪。○又議准。八九品官。止封本身。不封妻室。如願將本身封典。馳封父母者。准父母並封。八品官母封八品孺人。九品官母封九品孺人。○十

三年十月

諭朕登極恩詔內凡內外滿漢官自一品至九品均予封贈。所以錫類敷恩。遂臣子顯揚之願。勵移孝作忠之風也。舊例丁憂官不得均邀封典。朕思丁憂之人。乃恪遵朝廷定制。自盡其為子之情。與廢黜在家告假回籍者不同。況在任守制者。皆得霑恩。而丁憂之人。轉不邀恩。以榮顯其親。情既可憫。而理亦未協。著該部各按其原官品級。一併給予封典。以成孝思。○

又

諭凡官員丁憂守制者。遇有恩詔。例不准封。朕前已降旨加恩。給予封典。其養親回籍之人。皆因父母年高。

棄官歸養。幸遇親存。適逢曠典。而亦格於成例。不得請封。情屬可憫。著將回籍終養人員。照原官品級。一併給予封典。遂其孝思。○乾隆元年奏准。各省額設提塘。由武進士遴選充補者。准予封贈。○又議准。外任官員有加級者。不論新舊。不准照加級請封。○又覆准。升遷卓異薦舉各官。恭遇

恩詔之日。已離原任。未到新任者。均照原官品級。給予封典。○七年議准。八旗休致官

恩准食俸者。照原官封贈。○十七年

諭。臣子封贈之典。以三代為限。此即古者大夫三廟之

義其貤封之例。蓋專為二三品官不能封贈其曾祖父母。四品以下不能封贈其祖父母。推廣錫類之恩。以曲成其報本之意。若已得三代封典。而又請封高祖父母。是四代矣。綸綍之錫。上及三世。臣子之分。已為極榮。更等而上之。抑將何所限制乎。○二十年

諭。向來武職封贈。自二品至五品。均得授為將軍。此沿襲漢唐以來散官名號之謬也。國家制度。名實必取相符。今授鉞專征膺閫外之寄者。始稱將軍。而各省駐防。則一品大員也。乃以加之都守等弁。名不正則言不順。此甚無謂。考宋制武職原有武功大夫武功

郎等階。今一品武臣既封大夫。其二品至四品宜亦改稱大夫。五品以下則皆改稱為郎。但各冠以武字可耳。令軍機大臣等擬定字樣候朕酌奪。載入會典以昭典制。其從前已領誥敕亦不必追改。欽此。遵

旨議定。武職封階七等。正一品從一品仍均封榮祿大夫。正二品原封驍騎將軍。今改為武顯大夫。從二品原封驍騎將軍。今改為武功大夫。正三品原封昭勇將軍。今改為武義大夫。從三品原封懷遠將軍。今改為武翼大夫。正四品原封明威將軍。今改為昭武大夫。從四品原封宣武將軍。

今改為宣武大夫。正五品原封武德將軍。今改為武德郎。從五品原封武略將軍。今改為武略郎。正六品原封昭信校尉。今改為武信郎。從六品原封忠顯校尉。今改為武信佐郎。正七品原封奮力校尉。今改為奮武郎。○二十七年

諭奏請貤封。非格於定例者。其事率宜允行。惟是京員三品以上。例得自請。餘俱由吏兵二部查覈彙奏。而外官文自藩臬武自副參以下。一一皆以專摺具奏。待朕降旨。陳牘紛繁。殊於政體未協。嗣後除督撫提鎮等仍循舊例自行摺奏請旨外。其藩臬副參以下

各員著詳報督撫提鎮覈明與例相符。彙齊具奏。仍飭交吏兵二部覈覆准行。則大員俱候朕裁。衆職亦均歸畫一。將此通著為例。○又議准。請封文結止敘明某人室女。以禮聘娶。不必填註。並無再醮字樣。如有隱匿。察出將

誥敕追繳。匿情冒請之員革職。出結官分別議處。○又議准。欽奉

恩詔。有馳請誥封者。由吏兵二部查覈彙題。○二十八年

諭旗員武職有封承德郎文林郎者。名義亦覺未當。應

照漢官武職之例。六品改為武信郎。七品改為奮武郎。但漢官武職至七品而止。所有旗員之八九品武職。仍照舊制為修職郎。登仕郎。○三十一年

諭兵部題武職人員請給封贈一本。乃乾隆二十六年十一月內所奉恩詔。何以稽遲至今。方行請領。國家覃恩。推仁中外。俾人子均霑慶澤。榮及其親。伊等志切顯揚。自應及時祇領。即所經各衙門加結轉申。不嫌考覈詳慎。但任意延緩。遲越多年。不為定以期限。於體制殊未允協。再從前見各省題旌節孝。每援遠年恩詔為詞。曾經降旨各督撫採訪屬實。即隨時請

旌不必沿襲具文。若封贈誥敕。則更非尋常旌表者可比。必遇朝廷有大慶典。始舉行一次。伊等既得躬逢盛事。自當思早被恩榮。乃竟觀望逾時。並不即為請領。揆之情理。不應出此。亦豈所以欽承錫類之典乎。所有此次應給封贈人員。著該部即行趕辦。至嗣後凡遇覃恩。應定以二年為限。全行辦給。不得仍前怠緩。其過期不呈請者。即毋庸辦給。○三十二年

諭朕披閱清文鑑定本。見所列文武官階。尚有未盡妥協者。如文職自二品以下。咸分正從。惟一品俱誥授光祿大夫。未別等差。而一品武職所授榮祿大夫。考

之前代本屬文臣一品初授之階。若移為從一品文臣封典。於體制更為盡善。至文武事同一體。武職二品至六品並分正從。而一品七品並未區分。亦未免參差失當。著吏兵二部酌古準今。詳覈定議具奏。欽此。遵

旨議定。將一品武職所授榮祿大夫。移為從一品文臣封典。至武職品級。八旗官員自一品至八品止。除二品五品有從外。其餘俱係正階。漢官武職自從一品起至正七品止。並無正一品從四品從七品之職。其所授封典。旗員向照文職封授。

惟六品七品照漢官封授。今奉

諭旨詳覈定議。應將八旗封階歸入武職。並分正從。與綠營將弁一體參考定制。將武職正一品封為建威大夫。從一品封為振威大夫。二品至六品原有正從封階。仍循其舊。其正七品本係奮武郎。則從七品應封奮武佐郎。至八品旗員向照文職封修職郎。今將正八品改封修武郎。從八品封為修武佐郎。嗣後旗員綠營均照武階封授。以歸畫一。○又定公侯伯俱封建威大夫。○

三十七年

諭覃恩舊有貤封之例。原以子孫已列通顯。而祖若曾或未登仕版。或原秩較卑。因准廣為推恩。以遂顯揚之志。若子孫官品不及祖父之崇。則父為大夫子為士。記有明文。向即照其祖父原階封贈。定例本未允協。嗣後凡子孫職大祖父職小者。自應廣錫類之恩。其子孫職小祖父職大者。雖其在任時未得封典。亦不當因子孫遇有覃恩。仍照原官封贈。其如何定例之處。著該部詳悉另議具奏。欽此。遵

旨議定。嗣後文武各官。除子孫職大祖父職小者。仍照子孫官階封贈外。其祖父職大于子孫職小者。均

不准照祖父原官封贈。所有嫡母繼母從父官封者。亦毋庸給予。其生母從子官封者。仍照舊辦理。○又奏准。兵部差官。由三等武進士及一二等武舉充補。各照原銜給予封贈。○三十九年奏准。軍營文武各員。限內未經請封者。自凱旋之日為始。定限一年。准其陸續呈請。俱按恩詔以前各原品補給。其二年限滿後。始經派往軍營人員。未請封者。不得援照此例。○五十年奏准。凡加級請封之官。八品以下不得逾七品。本宗貤封。四品以下不得貤封曾祖父母。外姻止。

許貤封外祖父母。其餘外姻概不准貤封。官員改任受封。凡衙門地方調易而職階相同者。不准重封。至京官既有照加級請封之例。除官階級數與上次請封時相同者。仍不准重封外。所有加級既增。晉階較大。自應按其現在所加之級給封。其捐納各級概不准計算。○五十一年諭三通館進呈皇朝通志職官略一門。朕詳加披閱。其中所載文武官階諸多未協。國家設官封職。文武兼資。今志內文職則係正一品起。而武職則係從一品起。既顯然少予一階。且文職自正一品至從九品共

十八階。武職自從一品至七品。止十二階。多寡顯有懸殊。體制即暗為隆替。非所以著朝章垂令典也。所有武職人員。現在所缺正一品之階。應照朕前次欽定領侍衛內大臣將軍為正一品之例。增入一階。其自正七品以下。較文職所少之五階。亦應於內外武職衙門微末員弁內。按其職守。酌定正從。照文階一體釐正。再志內載舊例。武官正從一品。俱封榮祿大夫。正二品至從五品。俱封將軍。既未為允當。嗣後更定新例。則皆稱大夫。因思將軍為專閫主帥。大夫係文臣之稱。乃舊例則封將軍。而今又更封大夫。名義

殊覺混淆。嗣後武職正一品至從二品俱應封為將軍。正三品至從九品應分別酌予都尉騎尉校尉等字樣。遞為差等。以示區別。著軍機大臣會同吏兵二部詳悉定議具奏。欽此。遵。

旨議定。武職自正一品領侍衛內大臣起至從八品止。共十六階。又自從一品提督起至正七品止。共十二階。合內外統計止少正九從九二階。應遵旨增設以足十八階之數。與文職相埒。至封典名號。正一品原封建威大夫。今改為建威將軍。從一品原封振威大夫。今改為振威將軍。正二品原封

武顯大夫。今改為武顯將軍。從二品。原封武功大夫。今改為武功將軍。正三品。原封武義大夫。今改為武義都尉。從三品。原封武翼大夫。今改為武翼都尉。正四品。原封昭武大夫。今改為昭武都尉。從四品。原封宣武大夫。今改為宣武都尉。正五品。原封武德郎。今改為武德騎尉。從五品。原封武略郎。今改為武德佐騎尉。正六品。原封武信郎。今改為武略騎尉。從六品。原封武信佐郎。今改為武略佐騎尉。正七品。原封奮武郎。今改為武信騎尉。從七品。原封奮武佐郎。今改

為武信佐騎尉。正八品原封修武郎。今改為奮武校尉。從八品原封修武佐郎。今改為奮武佐校尉。正九品封修武校尉。從九品封修武佐校尉。○又定公侯伯俱封建威將軍。○五十二年覆准。協辦守備。向未指定品級。仍照千總給予封典。今准其作為從五品。所得封典。改照從五品給予。○五十三年題准。八九品官請封。揭送內閣撰給。

敕命。毋庸具題。○五十六年

諭。上年恩詔。內給予大小官員封典。其有應得封贈。懇

請照例貤封者。准令該督撫據情具奏。原屬推廣恩施之意。但立限雖有二年。今已屆滿。各督撫每遇一二員呈懇。即行專摺具奏。朕亦不過硃批有旨而已。殊屬煩瑣。嗣後著各督撫將呈請貤封之文武各員。於限內彙齊。年終具奏一次。不必陸續奏請。以歸簡易。○嘉慶元年

諭向來遇有覃恩。大小官員原准貤封。但所貤封之人。如係伯叔兄長外祖尊屬。身受撫育恩慈。例得推恩者。自應准給封典。若係疏遠戚屬姻親。亦輒轉懇請貤封。與例不合者。豈可漫無限制。嗣後內外大小官

員懇請貤封者俱著彙報吏部查覈所請情節分別
准駁彙題以省繁瀆而昭限制其有情節委曲不同
者該部聲明另奏若有私弊許科道封奏○四年奏
准內外大小各官業經受封而調任在

恩詔以前者秩雖未增銜已非舊且既有升任改任
之分則調任即為改任應照調任新銜給予封
典其未經調任者止准補請本身妻室封典不
准再請貤封○五年

諭前經降旨嗣後內外大小官員懇請貤封者俱著彙
報吏部分別准駁彙題以省繁瀆凡在臣工自應恪

遵辦理。乃近日復有專摺奏請者。自係明知與例不符。希圖特邀恩准。殊屬非是。嗣後內外大小官員。凡有情願馳封者。俱當遵照前旨。咨部彙辦。以符定制。毋得自行專摺奏請。致滋弊混。○六年奏准。南河河營協防外委。均照額外外委品級給予封典。○

十四年定。京外武職官員恭遇

恩詔頒行之日。取具六品以上同鄉京官印結。准其於請封限內。捐納新級請封。仍照定例。八品以下不得逾七品。七品不得逾五品。五六品不得逾四品。三四品不得逾二品。捐級時呈明專為

請封。並令於請封結內聲明。以便查覈。不得將此項加級註冊。抵銷處分。○又定曲阜林廟守衛司百戶恭遇

覃恩。給予正五品封典。○二十二年奏准。漢世爵公侯伯子男。及輕車都尉以下。恩騎尉以上各世職。如年未及歲。在家食半俸者。毋庸給予封典。其年已及歲。奉

旨賞給差使。並發標學習者。恭逢

恩詔。准給封典。○又奏准。革職有餘罪。報捐請封人員。照捐復原官之例。如問擬笞杖已經贖免者。

銀數酌加十分之二。未經贖免者。酌加十分之三。輕徒已竣者。酌加十分之五。滿徒已竣及軍臺已滿。換回贖回者。酌加十分之六。軍流贖免者。酌加十分之八。發遣新疆已經放回贖回者。加倍。如犯十惡貪汙等項事故者。不准捐封。○又奏准。捐納武職遊擊都司職銜。俱不准其照加級捐封。○又奏准。題補推升人員。例應引

見其引

見奉

旨在

恩詔前者。准照新銜給封。拔補千把外委微員。以題
准及部覆准之日在

恩詔前者。千總把總照題准之日。外委照覆准之日。
亦照新銜封贈。○咸豐六年

諭。曾國藩奏軍營保舉人員請准給封典等語。曾國藩
軍營節次保舉各員。選補尚無實缺。自應先被光榮。
著援照羅澤南等續賓給予封典前旨。准其擇保尤
為出力者數員。按照原保升階。咨部給予封典。毋許
冒濫。其有告假回省者。概不准給。以示區別。而勵戎
行。○光緒二年覆准。防營帶隊候補候選武職恭遇

覃恩援案請予

封典之處應令查照成案擇其尤為出力者按照官

階咨部覈給

封典毋許過多以杜冒濫